

Me Tesalonika Yai Leta Naona Paulo Wayahina

Buki Taina Wayahina

Buki taina a tau ginuma vivane Paulo. Ka leta taina leta naona omo tau ekalesia wayahia meagai Tesalonika nihenina. Meagai Tesalonika meagai ananina me Girisi yai papani ana wava Masedonia nihenina. Ka tutana Paulo leta taina ginumi, me Rom papani-nana iveimeyei. Ka tuta nonova wayahina Paulo me Tesalonika yai ekalesia a tau vi-putu. Ka munia, Paulo ni-tawanej, omo meagai Korinita wayahina, ka tenoke me Tesalonika vaneai nononi a tau ivaita ana wava Timoti wayahina.

Ka leta taina nihenina Paulo ya nuanua tau ekalesia yai vitumahana vo-vi-vatui. Tauna yawaina a venavenau nonova nui imamaei nua-vi-avini.

Ka tau ekalesia yai vi-tanai tupwai imamaei Iesu Tau Ito-yavuha ya mavi-havine wayahina. Iuna, tupwai tomotau wayahia paisewa habuhabuna ivihahaiei, ka ana heta Iesu ya mavi-havine wayahina ipotapota. Wayahina, leta taina nihenina Paulo yai vi-tanai-naia vona-nau-patei. Ka aviani nau-wawani idedewei a itoava Iesu ya mavi-havine wayahina, Paulo dewaia vo-vi-mahetei.

Nau-kaiwa

¹ Yauke Paulo kadu Silasi ka Timoti ainua nui yami leta taina aginumi omomo itomi tau ekalesia meagai Tesalonika nihenina wayahimia. Itomi Amaka Yaubada nihenina, kadu Kauvea Iesu Tau Ito-yavuha nihenina. Yama nuanua am-venena awawaehina kadu nua gomagomanina uvaniahei ainuai wayahia.✧

Me Tesalonika Yawai Wayahi

² Tuta habuhabuna wayahina Yaubada anau-kaiwei itomi habuhabumi wayahimi, kadu aviama wayahimi. ³ Ka tuta habuhabuna wayahina yama viama nihenina yami paisewa yaka Yaubada kadu Amaka matana anuanuani. Yami paisewaia iomomo yami vitumahana wayahina, ka udedewei iuna Tau Ito-yavuha udewa-vidovidohei. Ka kadu itomi utoha-vi-anai iuna yaka Kauvea Iesu Tau Ito-yavuha ya vona-dabadaba uvitumahanei kadu yami nuanua ananina uvaniahei. Yami dewaia habuhabui anuanuani yama viama nihenia.✧

⁴ Vona ahiahina, yaiai, yama vaimana wayahimi eha vitana, iuna anamanei Yaubada avaha vi-nua-dadanemi, kadu tauna dewa-vidovidohemi. ⁵ Nonova, tutana Vaneana Ahiahina anau-wahemi tuta naona wayahina, vaneana eha ipupuata. Ka tutana yama nau-wahena unononi, vona ahiahina, yau vonaia Nuana Ahihinata ya bagibagi wayahina ivin¹-omo, e memeanina wayahimia vonaia uvitumahanei tunutunuhina. Kadu itoai yawaiai ududueyei yami pai dune wayahina.

✧ **1:1:** Dew 17:1-9. ✧ **1:3:** 1Ko 13:13; Kol 1:4-6.

Adune-viviniaia yama dewa habuhabui tunutunuhina matamia, e yami vitumahana vovouna aivaitei deinake.✧ ⁶ Tuta-nana wayahina mani tomotau ivitavitami ananina, kadu inahē uvaniahe-havihavineī. Kate vitaiā eha aitam aviani wayahimia, ka itoai yawaiai udewa-v'-iunei, ka kadu Kauvea yawaina udewa-v'-iunei aitamoata deina. Ka Nuana Ahihinata ya dewa-haiawa wayahina Vaneana Ahihina uvitumahaneī, kadu uawaehei aitamoata.✧ ⁷ Wayahina, itomi yawaimi kadu vi-pai dune ahihina tau ekalesia habuhabui papani Masedonia nihenina imamaei wayahi, kadu tau ekalesia papani Akaia nihenina imamaei wayahi. ⁸ Ika, Tau Ito-yavuha Vaneana Ahihina vi-putu wayahimia, ka beli V ananina a putuna deina, vaneana omo papani papani awaniamia wayahia. Ka kadu itomi yami vitumahana Yaubada wayahina an' anamana ahihina avaha omo papani aitamoata aitamoata wayahia tanopi habuhabuna wayahina. Eha papani Masedonia ka papani Akaia ainua ai heta. Eha. Ka tomotau papani habuhabui nihenia avaha inononi. Wayahina, eha nau-wawaniai amataedai, iuna tomotauī avaha ianamaneī. ⁹ Wayahina, tauī yami dewa ivonevoneai, medeina unau-kaiweai, kadu medeina yami itupwana habuhabuna ka tutuaina uvihahaieī, e umagigino ka yawaimi uawaehei Yaubada wayahina, kadu medeina tuta ataina wayahina Yaubada Yawayawaina, vivane Yaubada-hoina, uvi-ateteyei. ¹⁰ Ka tuta ataina wayahina itomi

✧ **1:5:** 1Ko 2:4-5. ✧ **1:6:** Dew 17:5-9.

Yaubada Natuna upotepotei. Nonova Yaubada tauna Natuna si-vi-mini-havinei anigea, ka tuta tepakaia wayahina Iesu na-mavi-havine baina tanopia. Ka itoka habuhabuka kavitumahanei auyewana wayahina tauna na-honeka, e nui kamamaei. Na-iakwa, e tauna dewa-yaiyai ananina na-ito-iwahi mani tomotau wayahia.

2

¹ Vavaneiai, avaha uanamanei tuta nonova wayahina, tutana anau-vi-taumi, eha ata-paisewa-wayohe wayahimia. ² Tuta-nana wayahina, naona itoai amamaei meagai Pilipi wayahina. Ka tau vi-meagai-naia iapa-goyogoyoeai kadu ivitavitai ananina. Ika, viviwavana avaha unononi, ka avonevonemi, unuanuani vivane inahena eha ana pata ta-bou-potai. Eha-ohota. Itoai ate-vatu wayahina meagaina ani-tawanei aomo itomi yami meagai wayahina, e Yaubada ivaiteai Vaneana Ahiahina anaunau-waheyei wayahimia. Ka kadu tau vi-meagai tupwai yami meagai nihenina yai nuanua yama nau-wahe ibou-potei. Wayahina, inau-haviai ananina. ³ Kate tuta tuta itoai ama pata ate-vatu wayahina apaipaisewa deina. Ka eha yama nuanua anonomi uvitumahane, kadu eha aitam tuta wayahina ata-vitupu wayahimia, e yami gugua wayahia avi-tau kaikaiwabo deina. ⁴ Eha itoai ama heta yama nuanua paisewana apaipaisewei. Eha-ohota. Yaubada vi-nua-dadaneai, e tauna paisewana veneai vivane Vaneana Ahiahina anaunau-waheyei.

✧ 2:2: Dew 16:19-24; 17:1-9.

Wayahina, avi vona aipui-pupuemi, akanai vonaia iomomo Yaubada wayahina. Eha ama pata avona-kavokavovo, e tomotau avo-vi-dewa-haiawi yama vona wayahina. Iuna Yaubada itoai nuai nau-dadani. Wayahina, nau-wawaniai tauna avo-vi-dewa-haiawi.☆ ⁵ Ka kadu itomi avaha uanamanei eha aitam tuta at'-ana-dibidibiemi, uvitumahana, ka kadu eha ata-vitupu wayahimia, e yami gugua avaniahe deina. Yaubada yama dewa habuhabuna dudueyei, ka tauna avaha anamanei, itoai eha tau nua-tania. ⁶ Kadu tuta-nana wayahina, eha yama nuanua un'-awa-daveai, kadu eha yama nuanua mani tomotau in'-awa-daveai.

Vona ahiahina, itoai vivane Tau Ito-yavuha a tau hae, ka ama pata aveimeyemi una-ivaiteai. Kate eha ata-dewe deina. ⁷ Tutana yami meagai nihenina kamamaei, itoai mai-nuai, ka yama dewa habuhabuna bigana, aitam vavine tau yai tevana wayahia deina. ⁸ Ika, tuta-nana wayahina avaha adewa-vidovidohe mi ananina. Wayahina, memeanina wayahiai Yaubada Vaneana Ahiahina anaunau-waheyei wayahimia, kadu yawaiai avo-patami, un'-anamaneai. Iuna avaha adewa-vidovidohe mi ananina. ⁹ Vavaneiai, tuta-nana wayahina yama paisewa ananina unuani, kadu ama vitaia unuani. Vona ahiahina, ioyoma kadu auyewa itoai apaipaisewa, iuna aituhu avi tuta Yaubada Vaneana Ahiahina anaunau-wahemi, eha yama nuanua avitavitami ama ma' wayahina.☆

¹⁰ Itomi tau vitumahana Yaubada nui itoai

☆ 2:4: Gal 1:10. ☆ 2:9: Dew 20:34.

yama tau hae dewaia wayahi. Ka tuta nonova wayahina yama dewaia wayahimi unuani, vivane ahihinata, tunutunuhina ana noe, kadu eha ama ini-yauyau. ¹¹ Ka kadu avaha uanamanei, yama dewa aitamoata aitamoata wayahimia tunuhina, aitam onoto yana dewa tauna natunatuna wayahi deinake.✧ ¹² Ika, avo-vi-vatumi, avona-bigana wayahimia, kadu ahaeyemi nau-wawanimi yawaimi un'-awaehei Yaubada wayahina. Iuna tauna honemi ya pai veimea una-nui, kadu ya nuanua didigana na-vo-patami, vivane didigami.

¹³ Kadu aitam iuna mamaei, e tuta tuta Yaubada anau-kaiwei. Iuna tutana Yaubada yana vona anau-waheyemi, akanai tuta naona wayahina unononi, uawaehei eha tomotau yai vonata deina, kate uawaehei vivane Yaubada yana vona. Ka tuta ataina wayahina Yaubada ya vonana paipaisewa itomi tau vitumahana nihenimia.✧ ¹⁴ Vavaneiai, tutana Yaubada ya vonana uvitumahanei, uvi-putu Yaubada ya tau ekalesia papani Iudea nihenina udewa-v'-iunei. Tau ekalesia-naia Tau Ito-yavuha Iesu nihenina imamaei. Ka tau i mani me Iudea wayahia inae ananina ivaniahei. Ka itomi kadu inae uvaniahei mani tau vi-meagai Tesalonika wayahia aitamoata deina.✧ ¹⁵ Tuta nonova wayahina me Iudea tau apa-taputapu inau-vi-anigi. Ka munia, mani me Iudea Kauvea Iesu inau-vi-anigi. Ka kadu dewana munia kadu itoai itana-waviniai, ivo-tahoai. Tau i yai dewaia goyo-vainena, ka Yaubada nua-goyo yai dewaia wayahia. Ka

✧ **2:11:** Dew 20:31. ✧ **2:13:** 2Te 2:13. ✧ **2:14:** Dew 17:5.

taui tomotau habuhabui ai havia,[☆] 16 iuna yai nuanua yama nau-wahe taui eha me Iudea wayahia ibou-pote. Aituhu taui eha me Iudea yama nau-wahe ivitumahanei, akanai, kadu taui ito-yavuha ivaniahei. Kate me Iudea tupwai eha yai nuanua mani tomotau ito-yavuha ivaniahei. Wayahina, kadueyei taui yai dewa goyona inau-gwaugwau gwau ani-vainena wayahina deina. Ka tuta ataina wayahina Yaubada eha potapota inua-vinana. Eha. Ataina tuta wayahina tauna avaha ya nua-goyo yavuhi ivaniahei, akanai ai dewa-yaiyai.

Paulo Ya Nuanua Na-nau-vi-taui

17 Kate vavaneiai, tuta-nana wayahina nau-wawaniai ani-tawanemi. Ika. Nonova itana-vewanika tuta kutakutana wayahina deina. Ka vona ahiahina, ininika tana-vewanina imamaei, kate nuai nihenina anuanuani. Eha ata-nua-panimi, kate adewa-dadani anau-vi-taumi. 18 Ka itoai yama nuanua amavi-havine wayahimia. Ika. Yauke, taua Paulo, tuta tuta yau nuanua amavi-havine wayahimia deina. Kate tuta tuta wayahina Satana itoai yama nuanuana bou-potepotei. 19 Ka tuta tepakaia wayahina Kauvea Iesu na-mavi-havine tanopia wayahina, ka auyewana wayahina itoai yama nua-vaniaha nui tauna apotepotei, ka iuna taumi. Ka kadu itomi yama pai dewa-haiawa tauna matana. Tuta nonova wayahina yama nau-wahe uvitumahanei. Wayahina, auyewana wayahina adewa-haiawa, e

☆ 2:15: Dew 9:23, 29; 13:45, 50; 14:2, 5, 19.

itomi nui kamimini matana. Ka avi tuta Kauvea Iesu dudueyemi, dewana vivane didigai, ama kunu-nabanaba deinake. ✧ ²⁰ Vona tunutunuhina, itomi didigai kadu yama pai dewa-haiawa.

3

Paulo Timoti Vi-tunei Na-mavi-havine Tesalonika Wayahina

¹ Tutana tuta tupwana wayahina avaha tana-vewanika kamamaei, yauke yau nuanua ani-vainena vaneami anononi. Wayahina, avi-nua-dadani yauke au heta meagai Atenisi nihenina amamaei, ✧ ² ka Timoti avi-tunei na-mavi-havine wayahimia meagai Tesalonika wayahina. Tauna vaneika, ka kadu Yaubada ya paisewa paipaisewei, vivane Tau Ito-yavuha Vaneana naunau-waheyeyi. Ka yau nuanua tauna na-ivaitemi yami vitumahana na-vo-vi-bagibagi, kadu na-vo-vi-vatumi, e umimini toyoina. ✧ ³ Ka eha yau nuanua aitam wayahimia nau-dadanaia wayahia una-ihanua. Vona ahiahina, itomi avaha uanamane-vidoha, Yaubada ya nuanua wayahika vivane nau-wawanika nau-dadana tupwai kavaniahei. ✧ ⁴ Ika. Tuta nonova nui kamamaei, ka itoai amai-haeyemi havine havine vivane tomotau itoka tau ekalesia ivitavitaka. Ka aviani vin'-omo? Dewaia ivin'-omo yau vona wayahimia aitamoata deinake, a? ⁵ Ka nonova, avaha ani-tawanemi, apotapota, kate eha aitam vane wayahimi ata-nononi. Ka pai nau-yehata wayahina eha au pata

✧ **2:19:** Pili 2:15-16; 4:1; 2Te 1:4. ✧ **3:1:** Dew 17:15. ✧ **3:2:** Dew 16:1-3. ✧ **3:3:** 2Ti 3:12.

apotapota-wayohe. Wayahina, Timoti avi-tunei na-omo wayahimia, e yami vitumahana vaneana ana-nononi. Yauke amatamatauta, kaiwadi, Satana na-omo wayahimia, e na-nau-dadanimi ananina, una-peu, e yama paisewa habuhabuna wayahimi na-vita-vovoni deina.

⁶ Kate ataina Timoti avaha omo-havine wayahiua yami meagai wayahina, ka avaha itomi vaneami mataedau, vivane mataeda ahiahina yami vitumahana kadu yami dewa-vidovidoha ainua wayahia. Ka tauna voneu yami pai nuana wayahiu pai dewa-haiawa, kadu itomi yami nuanua amavina wayahimia, e anau-vi-taumi, yauke yau nuanua aitamoata deina. ⁷ Wayahina, yaiyai, tutana mataedana yami vitumahana wayahina anononi, akanai yauke ate-vatu, kadu adewa-haiawa. Baina inahe ananina avaniahei, ka tomotau ivitavitau, kate vaneami ahiahina ivaiteu. ⁸ Ka tuta ataina wayahina yauke ayauneu ahiahina. Iuna itomi Kauvea nihenina umimini-toyoo. ⁹ Ka tuta ataina wayahina Yaubada anau-kaiwei ananina wayahimi. Kate medeina yau nau-kaiwana Yaubada wayahina ana pata tauna wayahina? Tutana Yaubada matana amamaei, yau dewa-haiawa ananina, iuna taumi. ¹⁰ Ka ioyoma kadu auyewa wayahia aviama-bagibagi vivane tuta tepakaia wayahina Yaubada n'-awaeheu anau-vi-taumi. Ka auyewana wayahina au pata ana-ivaitemi yami vitumahana wayahina. Ka avi nua-uya wayahina uvi-kutakuta, akanai, yauke au pata yami vitumahana avo-vi-bagibagi, uvidoha

✧ 3:6: Dew 18:5. ✧ 3:7: 2Te 1:4.

deina.

¹¹ Wayahina, yau viama taina. Yaubada, tauna kadu Amaka, kadu yaka Kauvea Iesu ainua aviamei yama etawana ivo-vi-meani, e ana pata amavina wayahimia.✧ ¹² Ka kadu Kauvea aviamei tauna na-ivaitemi yami dewa-vidovidoha wayahimia natanata, n'-am-iwaihahi itomi wayahimia, e neine mani tomotau habuhabui wayahia. Itoai yama dewa-vidovidoha wayahimi avaha am-iwaihahi deinake. ¹³ Ka kadu aviamei tauna nuami na-vo-vi-bagibagi, iuna aitam auyewa omomo tuta tepakaia wayahina, ka auyewana wayahina yaka Kauvea Iesu na-mavi-havine, ka kadu ya tau ahihinata habuhabui nui in'-omo. Ka auyewana wayahina itoka Amaka nui kamamaei, tauna kadu yaka Yaubada, ka nau-wawanika tomotau-naia habuhabui mataia kamimini. Ka yau nuanua auyewana wayahina itomi ami pata ahihimiaata umimini, eha aitam aviani wayahina una-ini-yauyau mataia.

4

Yawai Tunutunuhina Yaubada
Ivo-vi-dewa-haiawi

¹ Yaiiai, yama vona pai nau-yehata wayahimia taina. Nonova tutana nui kamamaei, itoai awiwavenemi medeina Yaubada uvo-vi-dewa-haiawi. Ka nonova unononi, kadue tuta ataina wayahina yawaimi tunutunuhina deina. Ka ataina ahidahidami kadu anau-wahemi, yaka Kauvea

✧ 3:11: 2Te 2:16-17.

Iesu a wavea udune-vivinimi, e dewaia aviwavenemi un¹-awaehei inatanata yawaimi nihenina. ² Avonevonemi deina, iuna avaha veimeaia avenemi uanamanei. Ka ami veimeaia iomo Kauvea Iesu wayahina. ³ Ka veimeaia deina. Yaubada ya nuanua wayahimi yawaimi tunutunuhina kadu ahihinata. Wayahina, nau-wawanimi kenene habuhabuna uvihahaiei. ⁴ Ka kadu ya nuanua aitamoata aitamoata wayahimia ininimi uveimeyei, uvi-tau ahihimiata, e mani tomotau in¹-apa-vidovidohemi yawaimi wayahina. ⁵ Eha nau-wawanimi kenene nuami n¹-epe, mani tomotau tau eha Yaubada it¹-anamane yai dewa deina. ⁶ Ka eha nau-wawanimi mani tau ekalesia awawai uvainai, kadu eha nau-wawanimi tau yawai uvi-goyo kenene wayahina. Nonova aviwavenemi deina, kadu vona panina wayahina anau-vi-avinimi aituhu aviyaivia tuta ataina wayahina idedewei deina, akanai apaina tau ai dewa-yaiyai ivaniahei Kauvea wayahina. ⁷ Iuna Yaubada vi-nua-dadaneka kadu honeka yawaika ahihinata wayahina, eha yawaika gawagawamina wayahina. ⁸ Wayahina, aituhu aviyaivia viwavene-nana ivihahaiei, tau eha aitam onoto ya nuanua ivihahaiei, kate tau Yaubada ya nuanua ivihahaiei. Ka Yaubada tauna Nuana Ahihinata veneveneka. ⁹ Yaiyai, Yaubada avaha viwavenemi nau-wawanimi udewa-vidovidohemi. Wayahina, eha nau-wawaniai dewana wayahina aginuma

☆ **4:3:** 1Te 5:23; 1Pi 1:16. ☆ **4:4:** 1Ko 6:13. ☆ **4:7:** 1Pi 1:15-16; Ebe 12:14. ☆ **4:8:** Luk 10:16; 2Ko 1:22.

wayahimia. Avaha dewana uanamanei ahiahina.✧ ¹⁰ Ika. Vona ahiahina, tau ekalesia habuhabui papani Masedonia nihenina udewa-vidovidohei. Ka ataina ahidahidami dewana un'-awaehei na-nata yawaimi nihenina. ¹¹ Ka kadu aitamoata aitamoata wayahimia nau-wawanimi udewa-dadani yawaimi gomagomanina, eha uvi-tana-pununu. Ka aituhu itomi ami heta yami paisewa udune-vi-avini, uvidoha deina. Eha nau-wawanimi mani tomotau yai paisewa uveimeye. Ka nonova avonemi, aituhu nimami wayahia upaipaisewa, uvidoha deina.✧ ¹² Ka aituhu udedewei deina, akanai auyewa aitamoata aitamoata wayahina yawaimi vivane pai dune ahiahina. Ka avi tuta tau eha tau ekalesia yawaimi ahiahina idudueyei, akanai in'-anamanemi itomi tomotau ahiahimi. Kadu aituhu udedewei deina, tuta tuta mani tomotau eha nau-wawani ina-ivaitemi yami ma' wayahina, kate itomi tau ekalesia aitamoata aitamoata wayahimia ami pata deina.

Kauvea Ya Mavi-havine Wayahina

¹³ Yaiyai, eha yama nuanua umamae mwagemwagemi tau aniga wayahi. Kate yama nuanua vona tunutunuhina un'-anamanei tau avaha inusi wayahi. Iuna eha yama nuanua unua-vita wayahi, tomotau eha mini-havine ita-vitumahane inua-vita deina. ¹⁴ Itoka kavitumahanei Iesu anigea mini-havine. Wayahina, kavitumahanei avi tuta Iesu na-mavi-havine tanopia, Yaubada yaiaka habuhabui na-omanei, e tauna nui kadudueyei.

✧ 4:9: Ioni 13:34. ✧ 4:11: Epe 4:28.

Nonova tau i vitumahanei, ka tuta ataina wayahina avaha anigea iaino-ainei. ✧ ¹⁵ Ka yaka Kauvea ya vonana ahaehaeyemi. Avi tuta tauna na-mavi-havine tanopia, akanai tau ekalesia tupwai wayahikaia yawayawaika kamamaei a itoava auyewana wayahina. Kate itoka eha aka pata yaiaka avaha iaino-ainei kaeta-naoe, e ininika vovouna kavaniahe. Eha. ✧ ¹⁶ Dewaia a venavenau taina deina. Naona yaka Kauvea na-opu-me wahuma wayahina, ka tuta aitamoata wayahina movina ananina dewaia na-veimeyei, ka kadu anelose habuhabui ai tau eta-naonao tauna movina ananina wayahina vi-hone, ka kadue Yaubada ya bwegigi na-vaini ananina, e Tau Ito-yavuha a tau vitumahana habuhabui avaha anigea iaino-ainei imini-havine. ¹⁷ Na-iakwa, e aituhu aviyaivia wayahikaia yawayawaika kamamaei, itoka tau nui kavanevane wahuma, e habuhabuka you nihenina yaka Kauvea wayahina kanau-hohona. Ka tauna nui kama'-vavaha. ¹⁸ Wayahina, eha unua-vita, kate viwavene-nana unuanuani, ka vonana wayahina uvo-vi-vatumi kadu uvo-vi-dewa-haiawimi.

5

Yawaika Kavo-vi-aiia Kauvea Ya Mavi-havine Wayahina

¹ Yai ai, eha nau-wawaniai yami leta taina nihenina aginumi wayahimia ponimana wayahi, o kadi tuta wayahi, o kadi auyewa wayahi.
² Iuna itomi avaha Kauvea ya mavi-havine

✧ **4:14:** Rom 14:9; 1Ko 15:3-4, 12. ✧ **4:15:** 1Ko 15:51-52.

a vin'-omana uanamane-yehai. Auyewana a vin'-omana hivahivana, tau vainau yai vin'-omana ioyoma deina. Eha aitam koiaka t'-anamane avi auyewa wayahina, o kadi avi babau wayahina tauna na-omo.✠ ³ Auyewana wayahina tau ma' tanopi ivonavona, “Akanai, yaka ma' ahiahina. Eha ana pata aitam inahe kavaniahe.” Kate vo-kwayavonina vita-vovona vin'-omo wayahia, vavine ai viha tevana wayahina deina! Ka eha ai pata vita-vovo-nana wayahina ina-novo-tawane.✠

⁴ Yaiyai, tuta ataina wayahina itomi eha novanovana nihenina uta-mamae deinake. Wayahina, auyewana a vin'-omana eha ana pata vi-au-novomi, aitam tau vainau ya vin'-omana deina. ⁵ Iuna, itomi habuhabumi maheta a tau ma' kadu auyewa natunatuna. Itoka tau ekalesia eha ioyoma a tau ma', kadu eha novanovana natunatuna.✠ ⁶ Wayahina, eha nau-wawanika mani tomotau deina kamamae, luna tau i yawai tanopia mwagemwagei iaino-ainei deina. Ka itoka tau ekalesia nau-wawanika kanuanua tunuhina, kadu nau-wawanika ininika kaveimeyei ahiahina. ⁷ Ka tomotau-naia novanovana natunatuna, ka yai dewa goyona idedewei ioyoma, ka dewaia aniga ana dewa. Tau i inim-kavokavovo ka ioyoma ivi-kwavakwava. ⁸ Kate itoka tau ekalesia auyewa natunatuna. Wayahina, nau-wawanika ininika kadu yawaika kaveimeyei tunuhina. Vona ahiahina, avi tuta tau

✠ **5:2:** Mat 24:42-43; 2Pi 3:10; SiV 3:3. ✠ **5:3:** Mat 24:39; Luk 21:34-35. ✠ **5:5:** Rom 13:12.

nau-havia nau-wawani havia inau-haviei, naona tau ai kwama badobadona iweteweteni. Ka itoka tau ekalesia deina. Wayahina, itoka nau-wawanika vitumahana kadu dewa-vidovidoha kaweteweteni, vivane manakadaka a pai bou-pota badobadona. Ka kadu yaka nua-vaniaha nui Yaubada kapotepotei na-ito-yavuhika. Wayahina, nau-wawanika ito-yavuhana kaweteweteni, vivane ununuka a pai bou-pota badobadona.✧ ⁹ Kadedewei deina, iuna eha Yaubada ya nuanua dewa-yaiyai kavaniahe. Kate tauna ya nuanua wayahika ito-yavuhana kavaniahe yaka Kauvea Iesu Tau Ito-yavuha wayahina. ¹⁰ Tauna aniga itoka wayahika. Iuna tauna ya nuanua aituhu yawayawaika o aituhu aninigaka, akanai tauna nui kama'-vavaha.✧ ¹¹ Wayahina, itomi habuhabumi nau-wawanimi uvo-vi-vatumi, kadu uvo-vi-bagibagimi. Vona ahiahina, avaha udedewei deina. Ka yama nuanua eha ugenuana, kate uneine aitamoata deinake.

Paulo Ya Viwavenena Pai Nau-yehata

¹² Yaiyai, itoai yama nuanua aituhu aviyaivia ipaipaisewa toyoina wayahimia, e iaivaitemi, akanai itomi nau-wawanimi un'-apa-vidovidohei. Taiui yami tau eta-naonao-naia Kauvea ya paisewa wayahina iveimeyemi, kadu yawaimi ivo-vi-tunutunuhi. ¹³ Taiui yai paisewa idune-vivinimi. Wayahina, nau-wawanimi unua-opu mataia, ka dewa-vidovidoha wayahina uvi-ateteyei. Kadu

✧ **5:8:** Isa 59:17; Epe 6:14, 17. ✧ **5:10:** Rom 14:8-9; 1Te 4:14.

itomi habuhabumi nau-wawanimi wayahimia nua gomagomanina nihenina umamaei.

14 Yaiai, ahidahidami vona panina wayahina tau upu-tonetonene wayahimia yai dewa wayahi unau-vi-avini. Ka kadu aituhu aviyaivia wayahimia memeanina imatamatauta, nau-wawanimi uvo-vi-vatui. Ka kadu nau-wawanimi tau wayahimia iaihanua uaivaitei. Ka kadu nau-wawanimi tomotau habuhabui wayahia utoha-vi-anaimi.✧

15 Udune-vivinimi. Aituhu aitam koiaka dewa goyona dewei wayahimia, eha dewana goyona kadu aitam dewa goyona wayahina unau-pate. Itomi tau ekalesia nau-wawanimi tuta habuhabuna wayahina udewa-vidovidoheimi, kadu mani tomotau ekalesia upuna imamaei udewa-vidovidohei aitamoata deina.✧

16 Tuta habuhabuna wayahina nau-wawanimi udewa-haiawa.✧ 17 Tuta habuhabuna wayahina nau-wawanimi uviama. 18 Dewa habuhabuna wayahi nau-wawanimi Yaubada unau-kaiwei. Iuna Yaubada ya nuanua wayahimi Tau Ito-yavuha Iesu nihenina deinake.✧

19 Eha Nuana Ahihinata ya paisewa uvito-pote.✧ 20 Eha tau apa-taputapu yai vona uapa-goyogoyoe. 21 Naona viwavenena aitamoata unau-dadani. Ka aituhu aviani nihenina tunuhina, akanai upoy'-avini, ka yawaimi nihenina utotohi.✧ 22 Dewa goyona tunina tunina imamaei, ka nau-wawanimi dewaia habuhabui uvihahaiei.

✧ 5:14: 2Te 3:6, 11. ✧ 5:15: Rom 12:17; 1Pi 3:9. ✧ 5:16: Pili 4:4. ✧ 5:18: Epe 5:20. ✧ 5:19: Epe 4:30. ✧ 5:21: 1Io 4:1.

²³ Yau viama wayahimi taina. Yau nuanua Nua Gomagomanina a Yaubada tauna ana heta tau ma' tanopi wayahia tana-vewanimi, e uvi-tau ahihimiata ana noe. Yau nuanua nuami, kadu ininimi, kadu itomi hutami habuhabui hadahadanina imamaei a itoava yaka Kauvea Iesu Tau Ito-yavuha ya vin'-omana wayahina. Ka auyewana wayahina, eha aitam aviani wayahina una-ini-yauyau. ☆ ²⁴ Tuta tuta Yaubada yana vona kadu yana dewa aitamoata. Tauna honeka vivane nui kama'-vavaha. Wayahina, tauna kavitumahanei, iuna apaina aviani tauna vona-dabedabeyeka, dewaia kavaniahei aitamoata deinake.

²⁵ Yai, yama nuanua Yaubada uviamei itoai wayahiai. ☆ ²⁶ Nau-wawanimi tau ekalesia habuhabui unau-kaiwei mao ahihinata wayahina. ²⁷ Aveimeyemi Kauvea matana, leta taina una-iavi tau ekalesia habuhabui wayahia inononi. ²⁸ Kadu yau nuanua yaka Kauvea Iesu Tau Ito-yavuha yan' am-venena awawaehina uvaniahei, e wayahimia na-ma'-vavaha. Ana pata deina.

Yauke Paulo

☆ 5:23: 2Te 3:3. ☆ 5:25: Kol 4:3; 2Te 3:1.

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 11 Nov 2022 from source files dated 9 Oct 2020
b67aeef-7e9d-566a-9ff5-cb22ab7e2ea4